

# Bolwetshi bja mpshikela

Sepedi

kgato

3c



Theresa Segala



Ulwazi  
Lwethu

**Ditlhaka tše diswa**

psh, pšh

**Bolwetsi bja Mphikela**

**Sepedi**

**kgato 3C**

ISBN: 978-1-77981-025-0

© 2023 Ulwazi Lwethu African Languages Literacy Project

Mongwadi: Theresa Segala

Moswantšhi: Riaan Muller

Tlhagišo le Kalo: Rock Bottom Graphic & Design

Kgatišo ya mathomo 2023

# Bolwetsi bja mpshikela



**Theresa Segala**

Mapshike o tsenwe ke phefo mmeleng. O a roromela ebile o a ethimola. O opša ke hlogo. Mapshike o a lwala.





Mapshike o šoma kudu, mesong go fihla mathapama. O šoma go tonya a sa apara diaparo tša borotho. Bjale o swerwe ke mpshikela. Ke mpshikela wo mogolo. O lwala kudu.

“Mpshikela wo, o tla mpolaya. O šoro kudu.”  
Mapshike a realo. “Ga ke dume dijo, ga ke dume  
selo. Ga go se se tsenago. Mašole a ka a mmele a a  
fokola.”





Morwa wa gagwe Pšhatla, o balabala kudu. “Tate ga a je, ga a robale. E bile o phela a pshikologa.” Pšhatla a realo. Pšhatla a swara kgogo molomo, a ya thabeng. A bowa a swere lengana. Naa Mapshike o tla le nwa? Pšhatla a apea lengana a le fa tatagwe Mapshike. Mapshike a kgapha komiki, lengana la falala.

“Tate ga o nyake go fola. O reng o kgrapha lengana le? Bjale o tla fodišwa ke eng? Gona e re ke go rekele sehlare sa mpshikela.” Gwa realo Pšhatla.







Pšhatla o dula le tatagwe yo a dutšego gae ka botšofadi. Mmagwe o šoma toropong. O bowa gae ga tee ka kgwedi. Pšhatla o mo leleditše mogala go mo tsebiša ka seemo sa tatagwe. Mmagwe a mo eletša gore a mo rekele sehlare sa mpshikela.

Ka pejana Pšhatla a leba khemeseng , a bowa a swere sehlare sa mpshikela. A tšea lehwana a tshela sehlare sa mpshikela. Mapshike a nwa, a robala.






Mapshike a pshikologa, a pšhatla lebotlelo la sehlare. “Aowii! sehlare se pšhatlegile. Ke tla fola bjang? Ke sehlare sa theko ya godimo.”

“Tate, lebotlelo la sehlare le pšhatlegile. Sehlare se faletše.” Gwa bolela Pšhatla. “Hee morwa, e bile kotsi.” Gwa fetola mokgalabje a bonala a kwele bohloko.





Mantšiboa Pšhatla a dula a nnoši ka phapošitulelong a bogela thelebišene. Mogopolo o be o nagana ka bolwetši bja tatagwe. Gwa fihla sebaka sa ditaba mo thelebišeneng. A gogwa šedi ke go kwa go bolelwa ka bolwetši bjo bogolo bja COVID -19. Bjona bo aparatše lefase ka moka. Mašabašaba a batho a lobile maphelo ka bolwetši bjo. A tlelwa ke letšhogo.

Sehlare se pšhatlegile pšhotlo! Mpshikela o mo gateletše. Ditho tša gagwe di a baba. Ga a sa kgona go itirela selo. Pšhatla a gopola ka bolwetši bjo bogolo bja mpshikela.”Bjale gona ke go felegetša kliniking go lekolwa.” Mapshike a tomola mahlo. a šikinya hlogo. A re,” Moo ke mo ke sa yego.”





Mesong Pšhatla o ile a ya mabenkeleng go reka kuranta bjale ka mehleng. Letlakaleng la mathomo go be go ngwadilwe gore: COVID-19 Bolwetši bjo bošoro, ka maletere a magolo. Ge a fihla gae, a dula fase a bala temana yeo gabotse. Ya hlaloša dika tša bolwetši bjo le gore batho ba swanetše ba dire diteko.

Pšhatla a thoma go balabala ka pelo. A ya ka phapošing ya tatagwe. A mo lebelela mo malaong. Ga a kgone selo. Mokgalabje o a ethimola, o gohlola a sa khutše. A tšea kuranta a e lebanya le mahlo a gagwe gore a bale. Mapshike a bala, a lebelela morwa'gwe ka mahlong, a mo fularela.







Mapshike o no hlwa a pshikologa letšatši ka moka.  
Go bothata. Pšhatla o rapeletša tatagwe. “Aowii!  
Tate, a re ye hle.” Mapshike a lebelela fase.

Pšhatla a thuša tatagwe go emelela. Ba totoba, ba tseba ka koloing. Šibale ba leba kliniking. “Thušang!, thušang hle!” Pšhatla a goeletša. Baaki ba mo thuša ba bea Mapshike setulung sa go thwetha. Ba mo iša ka phapošing ya bohlahlofelo.





Ngaka ya hlahloba Mapshike. Ya mo dira le diteko tša COVID-19. Ba mo fa dihlang, ba mo laela go dinwa. Ba mo hlaba ka tšhwaana. Mapshike a ya le boroko.

Mooki a gopotša Pšhatla ka ditsela tša maphelo mo nakong ye ya COVID- 19:

- Hlapa diatla kgafetša-kgafetša ka meetse le sesepe.
- O ka šomiša sanithaisa.
- Hlokomela sekgoba gare ga lena.
- Apara maseke ge o eya bathong.
- Ge o gohlola goba o ethimola, šomiša sakatuku sa pampiri goba sejabana sa gago.





Mapshike o rile go fola mpshikela, a thoma go kganyoga dijo. Bjale o ipshina ka dijo e le ruri. Ga a sa pshikologa. Pšhatla le tatagwe ba boela kliniking go hlola dipoelo tša COVID-19. Ka mahlatse tša bowa di le gabotse. Ba ikwa ba lokologile.

Mapshike le Pšhatla ba leboga ngaka le baoki,  
ba boela gae. Go tloga letšatši leo Mapshike  
a netefatša gore o apara borutho ge go tonya.  
Ka dinako tšohle o be a phela a hlapa diatla  
kgafetšakgafetša ka meetse le sesepe. A bile a  
apara maseke.





## Readers

### Kgato 1

- Namune e nanana
- E ba bonolo Malebo
- Sebati le Segokgo
- Kamo o rata go penta
- Mollo
- Pokolo
- Lebile o a emaema
- Pula ya Semaka
- Go bala meropa
- Komelelo
- Yuna o gobetše
- Noga!
- Meriri e megolo
- Lerato la Gabo le Roro
- Di ka fofa?
- Bana ba go ba le mohola
- Sopo e bose
- Basetsana ke Badiši
- Yuna o maketše
- Jobe ga a robale
- Ba ka Polaseng
- Tate o tla boa neng?
- Lerato la mafahlana
- Jase e Fetogile

### Kgato 2

- Tsatsa wa šedi
- Go seketša meetse
- Meetse a ka mo le ka mo
- Monyai wa mathaitshai
- Šibelane sa Tinyiko
- Roko ya Mebalabala
- Tatso ya dijo tša baVenda
- Bula, Tswalela, Tšweletša
- Dieta tša Phuthi tše diswa
- Leseka la gauta
- Sebapadi sa Maemo
- Tšalatšala wa sengangele
- Kakanyo ye botse ya Mmira
- Dimpho
- Bolo e timetše
- Mmutla wa mahlašana

### Kgato 3

- Sehlare sa Phodišo
- Kwena ya leswena
- Molemi Morweši le dikgabo
- Matwetwe le dithuthupiši
- Bose bja motepa
- Bophelo bja segwagwa
- Motswako o bohlokwa
- Mohlafi wa mogale
- Mothei wa dihlapa
- Ga ke rate merogo
- Ke tše kgolo gona!
- Dipoo di a Itefeletša
- Mosetsana yo mabjoko
- Mehuta ya dinamelwa
- Seeta se se botse
- Dinose
- Bašimane ba bohlae
- Go fetoga
- O a hlobaela
- Setswalle sa nnete
- Bolwetši bja mpshikela

### Kgato 4

- Phumo wa lethabo
- Ba bapala
- Molatladi wa Lerato
- Setšo sa baVenda
- Tumo ya ga Moorri ya phethagala
- Bolwetši bja dikolobe
- Ntombi o swara lehodu
- Pule o tliša mmele
- Tate molaodi wa serapa sa diphoofole

### Kgato 5

- Go thuša Rakgolo go fola
- Mae a Kgarebong a timela
- Mama Afrika, Miriam Makeba
- Kgaugelo o tseba nako
- Peu ya mehlolo
- Re etela lešoka la diphoofole
- Mehlaro ya Afrika Borwa
- Toro ya ga Dimpho

**ZENEX**  
FOUNDATION

  
**MOLTENO**  
INSTITUTE FOR LANGUAGE AND LITERACY  
EST. 1974



Ulwazi Lwethu ke projeke ye e tšweletšwago le go hwetša thušo ya mašelang go tšwa go Mokgatlo wa Zenex ka maikemišetšo a go tšweletša dingwalwa tšeo di tlo go šikinya maikutlo a babadi ba maleme a se Afrika. Maikemišetšo a projeke ye ke go ruta le go thekga bana ba mephato ya fase go bala ka kwišišo. Dingwalwa tše di ngwadilwe ka dipolelo tše senyane tša Afrika ka tirišanommogo le Molteno Institute for Language and Literacies, Nelson Mandela Institute for Education and Rural Development, Room to Read South Africa, le Saide. Methopo ka moka e tšweleditšwe e le “Open Education Resources” (OER).

Please visit our website to download the full copy of this reader:  
[ulwazilwethu.org.za](http://ulwazilwethu.org.za)



Creative Commons Attribution-  
NonCommercial-NoDerivatives  
(CC BY-NC-ND) 4.0  
International Licence

Disclaimer: You are free to download and  
share this work as long as you attribute  
Zenex Foundation, but you may not change  
this work in any way or use it commercially.

